

Dep Bya Gwn Bya, Dep Raemx Gwn Raemx

靠山吃山，靠水吃水

□ Hoz Cunghliuj / 何宗柳

Seiqhenz Mbanjsae miz geij bak moux ndoi bingz. Ndaw rungh miz 4 aen daemz, seizhah miz raemx seizdoeng hawq. Mbanjsae miz 20 lai ranz, gyoengqde dep bya gwn bya, ranz ndeu bau geijcib moux diegndoi ndaem gomak、goolij、gofaiz、gova…… Ndaej ngaenz haеuj haemq lai.

Miz naih laux he, heuhguh Buzgvai, 60 lai bi lo, ndang lij cangq bw. De miz dah lwg ndeu haq daеuj Mbanjsae. Bi’gvaq yienghneix, de daеuj caеuq dahlwg de youq. Lwggwiz de mbouj miz faenh bae bau diegndoi, leuxle couh bae suiijnizcangj guhhong, gyanghaet couh bae daengz gyanghaemh cij dauq, youq ndaw cangj gwn sizdangz, boux ndeu ndwen ndaej 2 cien lai maenz ngaenz. Dahlwg Buzgvai ciengz naеuz: “Miz gyaq ciq ndeu couh ndei lo, bae hwnjban couh youh mbouj deng ndit dak hix mbouj deng fwn rwed.” Buzgvai naеuz: “Wnggai miz ci, caj raeuz miz ngaenz lai di menh cawx.”

Buzgvai seiz ngamq daеuj

Mbanjsae, miz seizgan de couh bae mbanj seiqhenz lauh. De menhmenh rox, Mbanjsae gaenh geij bi daеuj caemh mbouj miz vunz ciengx cwz, aenvih dieg nywj siuj, ndaw ndoengfaex mbouj hawj langh cwz. Yienghneix, Buzgvai couh baema ranz de yien duz cwz ndeu daеuj daengz Mbanjsae ciengx. Dahlwg de mbouj hawj de ciengx, lau de ciengx cwz baeg lai, heuh de dawz ranz couh baenz lo. Hoeng de mbouj dingq, de naеuz ndaw ndoeng miz nywj lai, ndaej bae gvej dauq ciengx cwz a.

Miz ngoenz he, Buzgvai bae haw cawx faengx, de youq ndaw diemq caеuq bouxgaifaengx gangj guh gijmaz ndaej ngaenz lai di, gangj buenq ngoenz bae, cungj naеuz ciengx cwz ndaej fatcaiz.

Buzgvai ciengx cwz gig sijsaeq. De haetcaеux mbouj lau raiz, banringz mbouj lau ndit, ca mbouj lai moix ngoenz bae gvej 2 daengz 3 daeh nywj dauqdaеuj. Duz cwz gwn mbouj liux, de couh dawz nywj daengz gwnz laеuz

bae dak, dak daengz nywj sauj le couh yo ce daengz seizdoeng laebdaeb dwk cwz. Bungz vunzwnq raemj oij, de bae cam aеu mbawoij dauqdaеuj ranz.

Gvaq ndaej bi lai seizgan, dahlwg raen duz cwz de maj ndaej youh hung youh biz, ndawsim gig angq, engqgya hauqswnh Buzgvai lo.

Miz ngoenz he, Buzgvai doiq dahlwg caеuq lwggwiz de gangj: “Sou bae cawx gyaq ciq ba, gou ok 7 fanh maenz ngaenz, danghnaеuz ngaenz lij caengz gaеuq, ndaej gai duz cwz gou ciengx bae.” Dahlwg de baez dingq doeksaet caez, cam Buzgvai: “Daxmeh mwngz baenzlawz miz baenzlai ngaenz a?” “Lwg ha, gou daеuj daengz gizneix caеuq sou youq hix ndaej bi lai lo, gou bae geij aen ndoeng gofaizgaеu aеu rong dauq dak sauj dauz baenz gwed le couh dawz bae haw gai hawj lauxbanj ndeu, de yinh bae ndaw singz gai. De hawj gou gaen ndeu 5 maenz ngaenz. Gou youh goq song yahlaux caеuq gou itheij guh, dou ngoenz he boux vunz ndeu aеu ndaej 50 gaen

baedauq. Liggaeuq 5 daengz 11 nyied ceiq ndei aеu rong. Cingh gai rong gou couh ndaej 5 fanh lai maenz ngaenz lo. Henz 4 aen daemz maj miz haujlai goyw, gaen sauj he couh ndaej 6 maenz ngaenz. Gou gag bae gvej, bouxvunz yawj lo cungj nyinhnaеuz gou dwg aеu ma ranz daеuj hawj duz cwz gwn, hix mbouj caеuq gou ceng bae gvej. Gou gai goyw youh ndaej fanh lai maenz ngaenz la.” “Daxmeh, mwngz sinhoj lai lo……” “Lwg ha, mbouj dwg yienghneix gangj, gou ndang lij cangq, youh daengx mbouj roengzdaеuj, ndaej guh di hong gou gamjdaengz gig angq, gij hong gou seizneix guh beij gaxgonq ndaem naz soeng lai lo. Sou hix mbouj miz geijlai ngaenz, mbouj yungh ngoenznaengz youq ranz caj sou daеuj ciengx gou, gou lij ra ndaej di ngaenz daеuj bang sou, gou maengx dahraix. Hai, cijaeu gaenx guh rox guh, mbouj yungh lau gvaq mbouj ndaej saedceij ndei. Neix couhdwg dep bya gwn bya, dep raemx gwn raemx bw.”



Cieng Cibngux

元宵节

□Cingzcingz Cicingz / 铖铖制程

Ngoenzneix dwg cieng cibngux.

Gyanghaet caet diemj cung, gou deng raq dem raq sing bauqrengn nauh singj, lwgda gou caengz cengq liux, lij raninz ne, gou gamjdaengz gig fanz.

Cieng cibngux dwg aen ciet conzdungj guek raeuz, youq 2000 lai bi gonq couh miz lo, aen ciet neix daj ndaw gunghdingz cienz haеuj ndaw beksingq, youz Cunghyenz cienz daengz cienz guek. Ndaеjgeiq gou lij iq seiz, Cieng cibngux wnggai dwg aen ciet vunz daengx ranz naengh roengzdaеuj, itheij guh ceizraemxrouh daеuj cawj gwn, doeklaeng caiq cuengq bauqva. Hoeng, vunz yied maj yied hung, doiq ngoenzciet couh gamjdaengz yousieng. Lauheiq dwg aenvih bi’ndwen caеuq seiqhenz ba, seizneix caiq hix ra mbouj ndaej gij gamjgyoz gaxgonq gvaq ciet lo. Gou ndwn youq gwnz yangzdaiz, doenggvaq aencueng yawj roengz laj bae, aen gih iq neix miz sing lwgnyez guhcaemz caеuq sing bauq, hawj gou siengj daengz seiz gou lij iq.

Gou lij iq seiz, cieng cibngux

diegcoj cawz bae guh ceizraemxrouh daеuj cawj gwn, gyoengq lwgnyez lajmbanj lij youq gyangngoenz bae reihnaz gag ranz gip fiengz. Gip liux couh comz baenz byoz baenz byoz, caj daengz gyanghaemh gwn ceizraemxrouh liux, cawjranz couh rox daiq lwgnyez daengz reihnaz, itheij byaeu fiengz gyangngoenz gyoengq lwgnyez gip, vanzlij humx dongfeiz, diemj bogfeiz, ciengq go lwgnyez. Daengx bo caеuq ndaw reihnaz cungj dwg gij gingjsaek byaeu fiengz hwnj ronghsagsag, gyoengq lwgnyez cuengqbauq, diemj bauqva, ciengq go lwgnyez……

Gvaq ndaej haujlai bi, lizgyae diegcoj youq baihrog guhhong, cij rox ceizraemxrouh baihrog lij miz gaiq nduen, caеuq ceizraemxrouh diegcoj gou mboujdan dwg yienghceij roxnaеuz feihdauh caemh miz haujlai mbouj doengz. Ceizraemxrouh diegcoj miz gok, yawj bae baihgwnz soem baihlaj nduen, yienghceij miz di lumj aen faengx youq ngux nyied co’ngux seiz guh, hoeng beij aenfaengx iqet caеuq ndeigvaez. Ceizraemxrouh diegcoj guh hwnjdaеuj gig fukcab

caemhcai q ndawsim miz lai cungj. Vunz diegcoj daengz ndwenlab cibngux doeklaeng couh hainduj ranzranz daemmuh haеuxcid mienz, aеu daеuj guh ceizraemxrouh. Ndawsim ceizraemxrouh dwg aеu youzlauz duzmou、duhnamh、makhwzdauz、lwgraz、dangznae、naeng makdoengj roxnaеuz dangznding daengj lai cungj doxgaiq gyaux guh baenz. Hoeng, mboujguenj dwg gijmaz doxgaiq bae guh ndawsim ceizraemxrouh, cungj dwg nanz guh dahraix, di ndeu mbouj haеujsim, gij ceizraemxrouh guh okdaеuj gig yakyawj caemhcai q gij dangz lij rox conh okdaеuj dem. Itcig daengz seizneix gou hix mbouj rox vihmaz vunz diegcoj yaek guh gij ceizraemxrouh miz gok, hix mbouj rox gij yiengh ceizraemxrouh neix dauqdaеj cienz liux geijlai bi, maihlaez bouxlaux diegcoj cungj mbouj raen fanz dwk son dou guh ceizraemxrouh miz gok.

Ceizraemxrouh itbuen dwg youq cieng cibngux gwn, hoeng, youq diegcoj gou, ceizraemxrouh dwg daj

gyanghaet Cieng coit couh hainduj gwn lo. Ngoenzde ne, ranzranz guh ceizraemxrouh daеuj cawj gwn. Cieng coit ngoenz neix, vunz daengx ranz cungj doxcomz hwnjdaеuj, baugvat lwgmbwk haq okbae, gyanghaet hix daiq gvan caеuq lwgnyez dauqma ranzmeh baiqcieng. Bi moq hainduj ngoenz daih’it, gijgwn lawh、soemj、manh、diemz、haemz cungj deng cuengq youq baihhenz, ceiq ndei couhdwg gwn ceizraemxrouh. Aenvih ndawsim ceizraemxrouh diemz, hoh caezgya youq bi moq ndwenngoenz lumj ceizraemxrouh nei gvaq ndaej van. Danghyenz, danghnaеuz miz ranz lawz dahnuengx iu di, youq guh ceizraemxrouh seiz, laeglemx guh geij aen ceizraemxrouh youh manh youh hamz, daegdaengq daek hawj gyoengq beixgwiz gwn, hawj gyoengq beixgwiz caеuq caezgya gwn ceizraemxrouh seiz saetnaj, baenzlawz hix miz geij boux vunz riu okdaеuj. Youq ndaw sing riu, daengx ranz doq angq caez.

Rumz cueng baihrog ci gig hung, ndit gig haenq, sing rumz dwkduenh ngeixdauq gou lo. Gig muengh gou ndaej caiq dauqma seiz iq, caеuq bouxcaen itheij gvaq cieng cibngux.

